

# Nus duvrain l'art e l'art dovra nus

## In di cun e davart art e cultura

■ (cp) **Ils 29 da settember lantscha «cultuRa+», in program da cultura da la Lia Rumantscha, la stagiun d'atun 2012. Nus duvrain l'art e l'art dovra nus.** En il champ da tensiun da questas duas constataziuns vegn ponderà e discutà ensemen cun differents acturs dal sector cultural a partir da las 16.00 en Chasa Rumantscha. Quel di na duai però betg mo vegnir cuntentà in unic senn. *Justina Derungs* cumenza la saira cun extracts da ses nov toc da teater «Celestina». Silsuenter discutechan *Gianna Olinda Cadonau*, «cultuRa+», *Manfred Ferrari*, Postremise Cuir, *Sonja Hägeli*, Fundaziun Ernst Göhner, *Carlo Portner*, cumissiu da cultura Grischun ed *Annina Sedláček*, artista, davart la «promoziun e dischpromoziun da la cultura». *Anna Serarda Campbell*, redactura RTR, maina la discussiun. Plinavant propona l'actor *Tobias Durband* sia via co prender per mauns l'art e ses basegn cun sia performance «punctart». *Rezia Ladina Peer*, *Andi Schnoz* e *Rolf Cafilisch* completteschan il di cun soul rumantsch ed englais.

La stagiun d'atun 2012 da «cultuRa+» sa preschenta in pau auter che las trais ultimas stagiuns. Durant questa emprima fasa dal program – dapi la primavaira dal 2011 fin ussa – è «cultuRa+» stà arranschà sco program da la stagiun. Cunquai che «cultuRa+» è concepì sco program da promoziun na vul «cultuRa+» betg programmar quest atun in singul program, mabain realisar trais coproducziuns. Uschia po «cultuRa+» sustegnair ulteriurs projects da cultura e cuntanscher

sias finamiras: Il program vul esser in partenari da discussiun per las artistas ed ils artists. L'intent è da cultivar in barat davart dumondas da produciun e davart l'aspect rumantsch en lur projects.

L'emprim dals trais projects da l'atun è ina collavuraziun cun la Sonda lunga (Langer Samstag) a Cuir. En il rom da questa occurrenza ha «cultuRa+» a partir da l'onn passà ina «carte blanche» ed ha damai la pussaivladad da plazzar per duas giadas in'ura in punct dal program en la Postremise Cuir. La «carte blanche» da quest onn prevesa tranter auter ina preschentaziun da la furmaziun «C'est si B.O.N.». I sa tracta d'ina furmaziun experimental cun commembers dals «Fränzlis da Tschlin». La segunda coproducziun è l'ediziun rumantscha da la performance d'installaziun «B wie Biancaneve», ina produciun da Trickster-p che vegn inscenada en il teater da Cuir. «cultuRa+» pussibilitescha la realisaziun da la versiun rumantscha. La terza coproducziun da quest atun fa «cultuRa+» ensemen cun Weekly Jazz. Rolf Cafilisch, l'iniziant e realisatur dals concerts da jazz emnls en l'hotel Marsöl a Cuir, vul promover il rumantsch en la communicaziun – saja quai sin tribuna, en la pressa u en la rait – uschia che ses diever sa chapescha pli e pli da sasez.

**«In di da cultuRa+» Kunst bedarf Kunstbedarf, nus duvrain art dovra ils 29 da settember 2012, a partir da las 16.00 Chasa Rumantscha, Via da la Plessur 47, Cuir l'entrada è gratuita. Il program detaglià chattais Vus sin [www.liarumantscha.ch](http://www.liarumantscha.ch)**